

Tuesday, August 25, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



ASSEMBLY

Mizoram State Legislative Assembly 9-na thutkhawm vawi 7-na chu Speaker Pu Lalbiakzama kaihhruaiin vawiin chawhma dar 10:30 khan tan a ni a, kumin July ni 4-a thi Mizoram State Legislative Assembly Member hlui Pu F. Malsawma sunna hun hman a ni.

House Leader, Chief Minister Pu Lalduhoma'n Pu F. Malsawma chanchin leh sunna thu a sawi hnuah Eptu Leader Pu Lalchhandam Ralte-in sunna thu sawi ve lehin, Eptu member Dr. R. Lalthangliana, Pu C. Ngunlianchunga, Dr. K. Beichhua bakah rorellai member, Minister Pu Vanlalhlana, leh Dr. Vanlalthlana ten sunna thu an sawi bawk.

Sunna hun hman a nih hnu ah zawhna leh chhanna hun hman zui nghal a ni a. Zawhna leh chhanna hun hman a nih hnuah rorellai member Pu TBC Lalvenchhunga motion putluh - State Institute of Hotel Management building sak zawh tawh, hun rei tak chhung hman lohva awm hi tualchhung mi ten tangkai zawka an chhawr theihna turin chak taka hmalak ni se. A tul a nih chuan outsource turin emaw, GAD hnuai 'The Mizoram Government Land Pooling and Management Scheme' anga a tul anga hman tangkai turin chak taka bawhzui ni rawh se, tih chu member ten an sawiho hnuah an pawm a ni.

Vawiin hian House dawhkanah lehkha pawimawh hrang hrang pharh niin, report tur pawimawh te report a nih bakah bill chi hrang hrang putluh te sawihovin an pawm bawk.



BANA KAIH PROJECT

Mizoram Assembly Session fur thutkhawm tanni vawiin khan Ṭawi Bialtu MLA, Minister Prof.Lalnilawman a bial chhunga “Artuia Intodelhna tur Bana Kaih Project” kalpui mek aṭanga, a bial mipuite thar artui chu vawiin khan MLA te a thartem a ni.

He project hi Prof.Lalnilawma’n a MLA fund hmanga a kalpui niin, he project hnuaia beneficiary te chu MLA fund kaltlangin Ar In sakna tur Rangva pek an ni a. Ar note man zaa 75 chu MLA Fund aṭangin pek an ni a, zaa 25 chu beneficiary ten an tum thung a. Ar chaw man chu thla 5 chhung atan zaa 75 chu MLA Fund aṭanga pek chhoh mek zel a ni bawk.

Tunah hian Ṭawi Bial chhunga he project beneficiary te hian an artui tharchhuahte an hralh chhuak ṭan mek a ni.



MAMIT NCORD :

Mamit Dist ah kumin chhung hian ruihhlo kaihhnawih case 37 register a ni tawh tih vawiina Mamit District Narco Coordination Centre (NCORD) committee ah tarlan a ni.

Meeting hi DC Conference Hall-ah Addl DC Pi Carolyn LB Khiangte kaihruaia neih a ni a, Addl SP Pi C Lalbiaksiami tarlan danin, kumin hian school leh college-ah awareness campaign vawi 6 hman tawh niin ruihhlo kaihhnawih case hi 8 register tawh a ni a ti. Excise & Narcotics, Mamit chuan kuminah ruihhlo kaihhnawih 37 case register tawhin awareness campaign hi vawi 6 zirlai 900 chuang hnenah an nei tawh a ni.

Committee chuan ruihhlo do kawnga hmalak dan sawiin school leh college mai ni lo khaw hrang hranga NGO leh khawtlang hruaitute nen tang kawpin awareness campaign chu nasa leh zuala kalpui a ngai a ni a ti a, Mamit district a De-addiction centre siam tuma hmalak dan kal zel ngaithlak a ni bawk.



VAIRENGTE DRUG SEIZED

Vairengte Police leh CID ṭangkawp ten Methamphetamine KG 5 a rit man.

Nimin tlai dar 4 vel khan Vairengte Police Checkgate a duty Police leh CID (SB) te ṭangkawp chuan lirthei endikin Vairengte aṭanga Assam lam pan two wheeler scooter atangin Kg-5 a rit Methamphetamine an man a.Heng damdawi man te hi tualchhung sum aṭanga chhut in cheng vbc 4 hu vela chhut ani.

Heng damdawi kaihhnawih a man scooter khalhtu Isaka kum 39 Vairengte Zalen veng chu man niin a lirthei pawh hrensak nghal a ni.



BJP

Bharatiya Janata Party (BJP) chuan Punjab Assembly inthlan neih turah seat 117 an chuh dawn.

Patiala a Zonal meeting tum 1-na an neih ah he thu hi BJP General Secretary (Organisation), BL Santosh chuan puangin, an party chu inthlak danglam turin a inring chho mek a, Punjab state-a rorel ngei turin hma an la a ti.

Punjab hi nakum kumtir lama inthlang tura ngaih a ni a, BJP chuan chak ngei tumin hmalakna beihpui an thlak tan a ni.

(Newsonair)

